

嘉慶松江府志

松江府志卷六十

古今人傳十二

國朝

范棫士字祖年號芄野婁縣人華亭籍少游黃中允之
雋周比部吉士之門以文學稱弱冠補金山衛博士弟
子員名籍甚乾隆元年登鄉薦會試屢擯館 怡親王
邸十七年 王甚重之壬申成進士

廷對

賜第二人及第授編修擢福建道監察御史充丙子戊子
順天鄉試同考官時順天多外省冒籍棫士疏請嚴禁

大學士蔣溥請以會試薦卷選取中書椽士又請於錄
用中書外擇其年力老成堪課士者用爲學正學錄俱
下部議行屢任巡城奸格不行轉兵科給事中調工科
掌印給事中椽士清望素著爲朝士所重三十喪偶不
復娶與人交坦然和易居官雖貧遇故鄉親友困乏必
力爲資助又倡置雲間會館以居鄉會試之來京者善
行楷遠近爭購之乾隆三十四年卒年六十子錫圭乾
隆二十四年舉人廣東高明縣知縣以清白聞

黃達字上之華亭人乾隆十七年進士官淮安府教授
訓士諄至不異居鄉教授時平居蒐輯故實凡忠孝節

烈及畸人端士悉爲作傳表其微古文徵實處不及沈大成而沖融澹遠過之大成稱其詩旣自寫其性情而復準以古人之法律則亦異於剽竊模擬者著有一樓詩文集

陳孝泳字賡言婁縣人博雅工篆隸乾隆十年

詔修西清古鑑汪文端由敦以孝泳薦入

齋宮校閱旋舉十七年順天鄉試書成復奏留供奉

懋勤殿裘文達曰修薦爲學正累官鴻臚寺少卿

特命同南書房行走改通政使參議轉副使陞光祿寺卿以疾解任

賜醫調治卒年六十五孝泳侍直

內廷凡奏御筆札用篆隸八分者多奉

敕書進至

內府儲藏法書名畫鐘鼎法物

詔下詞臣審覆者皆得孝泳一言爲定其考訂之精可與
郭恕先黃長睿相伯仲舉孝廉後七試春官不第其謝
同南書房翰林行走表云舉頭黃榜昔思成進士之難
聯步丹墀今獲從翰林之後一時稱其雅切

婁志

陳憬字蟾客婁縣人乾隆十七年舉順天鄉試考授內
閣中書陞侍讀轉補兵部郎中旋擢雲南道御史條奏

倉庫驛站事宜深切時勢陞禮科給事中巡視東城轉
吏科巡通州漕務旋又巡視中城屢著勞績性愛賓客
休澣之暇陶情詩酒工草隸著有蘆香吟稿集志
張錫德字南仲華亭人自號南垞老人工詩文兼善山
水與王憲會齊名乾隆十七年副榜家居教授三十餘
年選青陽訓導甫三載以疾歸著有存誠堂詩鈔

沈泰字杲之華亭人祖宗敘福州同知家世儒風泰尤
貧以筆畊奉甘旨乾隆十八年北闈領薦留都下庚辰
聞母病亟歸而母已卒終身不復會試親柩未葬出告
反面如依膝下者然爲人恬靜自守文體會入微瓣香

在江西五家詩古文亦有法度

劉應璧字東府上海人性敦樸篤孝友爲文原本經術
乾隆十八年登順天鄉薦弟應巨磊落不羣工詩古文
詞爲名諸生

王昶字琴德青浦人父士毅生平有潛德昶乾隆十八
年進士丁丑

南巡召試

賜內閣中書擢主事轉員外郎累充鄉會試同考官從征
緬甸金川以軍功

賞戴花翎擢大理寺卿晉右副都御史歷直隸江西陝西

按察使雲南江西布政使晉刑部侍郎壬子順天副主
考與

千叟宴

予告歸年八十三卒昶詩文清贍著作等身未第時名
滿天下與王鳴盛錢大昕吳泰來曹仁虎同郡趙文哲
黃文蓮有吳中七子之目日本使臣高棟見其詩歎服
自倬直

樞廷參豫戎幕以至秉臬開藩躋秩卿貳中外三十餘年
竝著茂績奉

使東北踰輿桓西南抵滇蜀所至訪求金石延攬人材又

生平以勤慎結

主知告歸

恩遇有加

諭以春融就道歸卽以名其堂葺宗祠創義塾優游林下
十餘年執經問字者無虛日著述詳藝文中

徐秉哲字紹虞上海人父翰飛諸生好讀書尙氣誼故人死其孤寡不能自存買屋以栖焉代之嫁娶而後已秉哲窮經積學乾隆十九年成進士官徐州教諭勸學興行卒於官嘗選大家文爲多士式子曰鎮太學生撫弟堂有恩堂字秋檀能詩文工書乾隆五十四年舉人

初貢生趙旭生有藻鑑秉哲從之游賞其文妻以女後

秉哲果成名

上海志

吳大勳字建猷青浦人乾隆二十一年舉人由功臣館議敘選江西信豐令俗健訟牘多告爭墳山者且惑形家言葬數年猶發冢視骸骨卜休咎大勳嚴禁法在必行風始息量移新建會兩廣總督李侍堯過南昌前驅索供億大勳杖之李逐其僕奇大勳尋以卓薦擢尋甸州陞麗江府知府麗江故土司沐氏地民九種皆麼些夷人質柔性蠢大勳寬猛兼濟四境晏然坐公事鐫級起補順天府南路同知旋居父喪服闋起原官歲大饑

請發賑總督梁肯堂以格於成例不許大勳懷印綬詣
戟門固請不已梁怒拂衣起大勳俟於門日且晡幕府
食以飯大呼曰百姓飢且斃大勳忍獨飽乎語聞梁出
復陳民困狀聲淚俱下梁心動許之大勳頓首謝乞速
奏章上蒙

恩俞允賑遂普後復註吏議改四川保寧府同知改牧西
陽州州地皆童山無良田久旱澤苦焦飢仆駢坐大勳
請撥秀山存剩軍米一千七百石平糶并免徵津貼銀
民賴以生明年復旱露頂祈雨三日夜果雨秋蝗設八
蜡神位於龍王廟爲文以祭之蟲不爲災治行稱第一

年七十三卒著有讀易枝辭滇南聞見錄喜雨齋雜著
西陽公餘錄

凌應曾字祖錫上海人如煥姪由拔貢中乾隆二十一年順天榜爲古文根柢經史詩冲澹無俗韻選貴池教諭以待銓翰林院待詔歸卒著有古歡堂稿

上海志

唐芬字馴叔南匯人班季子乾隆二十一年舉人一赴公車卽養病不出詩五言冲澹近王孟近體學中晚唐著有見天閣詩稿子鳳嘉慶十三年舉人

南匯志

陸惇宗字望之青浦人父榮程康熙癸巳舉人孝友能文惇宗乾隆二十一年領鄉薦選福建平和縣邑濱海

木
卷之二
民椎埋掘冢其大者或忤憤械鬪傷殘惇宗寬猛兼濟
俗漸戢營兵聚博徒恣爲不法遣吏攝治其同伍竄取
之捕黨與置諸法一時股弁調閩縣時歲饑米價翔貴
請平糶二萬餘石民以安知府某嘗至臥內見室無長
物因謂曰官舍竟同僧舍邪歎息而去以母老乞養歸

青浦志

沈樹聲字得路其先自湖州之竹墩徙華亭遂家焉樹
聲爲制藝極工與婁縣吳士映青浦朱位行齊名由拔
貢領乾隆二十一年順天鄉薦二十二年成進士考取
咸安宮教習選池州教授會除風聞大旱奉檄賑飢按

戶給發無浮冒流民盡復特薦授河南內黃縣到官興
利除弊事悉辦鄰省盜魁未獲遣役鉤捕得之擢江西
建昌府尋調湖北安陸府安陸城外富民河歲久闕淤
建議疏濬會歲饑以工代賑全活甚衆工未竣遷山西
太原踰年

駕幸五臺奏對稱

旨蒙

恩賞宴旋擢浙江溫處道四十九年

翠華南幸復蒙

召對賞賚稠疊明年擢長蘆鹽運使以前溫處道任內失

察平陽縣事部議褫職恭與祝

釐蒙

恩開復年老不復出卒年七十八樹聲初名雲際更名若木復改今名士映字思澄乾隆癸酉舉人官浙江嵊縣知縣兩充同考官吳一騏景江錦皆出其房尙書彭元瑞深重之位行字因在師事金壇王步青乾隆十八年拔貢著有詩文稿

彭文勤元瑞撰墓志

王紹曾字衣聞金山人頊齡曾孫乾隆二十二年進士改庶吉士授編修大學士梁文莊公少宗伯介公咸器之薦辦院事典雲南試充功臣通考兩館提調尋充方

略館纂修丁父憂歸起寧波府知府郡濱海多盜捕卒
弛縱或因以爲利紹曾廉得按治之境內惕息其拳勇
鬪狠者籍姓氏榜之通衢郡大治未幾以會勘事被議
命往雲南效力以疾卒於騰越

鄭虎文
撰墓志

曹錫寶字鴻書上海人祖煜曾父培謙錫寶乾隆六年
順天舉人試中書在 軍機裏行二十二年成進士改
庶吉士以憂歸家居近十年三十一年改刑部主事游
陞郎中出爲山東糧道註吏議降部員 四庫全書館
開分辦黃籤考證書成優敘以國子監司業用五十年
與

千叟宴尋授陝西道監察御史先是大學士和珅當路竊威福錫寶具疏劾珅家人劉全服舍踰制冀以動珅珅先已得報因令全星夜滅其迹比疏入

命王大臣借勘無左證部議鑄三級

高宗純皇帝不之罪改革職留任又七年卒年七十四嘉慶四年

上親政和珅賜死籍劉全家有

旨褒其直言追贈副都御史廕子江大理寺評事錫寶初在軍機與同直武進莊培因齊名既成進士疊司文枋屢任巡城竝以清直著聞耄而好學春明邸舍日鈔

經史子集數葉以爲常與人交推誠有古道於桑梓誼尤篤其沒也鄉人久而思之著有古雪齋詩集

朱文正墓志

允祖諱字芳谷華亭人乾隆二十四年舉人由咸安宮教習知浙江縉雲縣嘗爲鄉試同考官所取多知名士在任二載卒兄嘉樹習刑名祖貽事兄嫂甚恭非衣帽不見朔望必起居焉行事近迂緩然立品甚端云

朱寬字紀常華亭人性豪邁有大志年踰四十無所遇以詩酒自娛嘗因省試過京口見一浮尸傾行囊葬之又嘗館鄉中見壇墼閒有古碑臥糞土中卽出金召里人拽之起他好義多類此乾隆二十四年舉於鄉貧無

斧資徒步走京師入闈被斥范芄野侍御留之不可遂
歸所居距城數里風雨一椽敝衣破履蹠踐道路閒賣
文錢所入悉付酒家年八十餘卒爲文光洋恣肆奇氣
四益詩學昌黎盧陵五七古尤長卒後遺稿散佚

王廷和字璧珊華亭人乾隆二十四年舉人授海州學
正廷和性醇慤以翰墨爲事鍵關著述不輟寒暑及爲
學官雅志教育識揚純於諸生中助以資斧俾省試果
獲雋茂饑寒賑朝奉檄夕飲冰奔走風埃中不辭勞瘁
後假歸卒所著有峯泖志續松風餘韻雲閒遺事寶善

堂詩文集

吳有容字南弧婁縣人廷揆曾孫年十九領乾隆二十四年鄉薦知河南桐柏縣結吏議會川楚教匪滋事桐柏爲由楚入豫要道大吏知其才仍檄攝縣有容團練鄉勇晝夜徼巡賊不敢犯時將軍興岱尙書惠齡先後領

大兵過境供張絡繹經畫裕如事平詳請給賑民賴以安巡撫景安奏請開復調知汝陽鹿邑尋病卒

王永祺字延之婁縣人以歲貢中乾隆二十四年順天舉人事祖母吳以孝聞父客死中州永祺徒步從風雪中扶喪歸里資斧窘乏道出湯陰故舊有貸以金者辭

木
卷之二
不受年近六十遭母喪哀毀如童稚斬衰三年未嘗狗
俗以墨衰謁客平生於書無所不觀晚乃一
六十六卒門人私謚孝簡先生子鼎字祖錫乾隆庚子
舉人工詩辭寶序自有傳

顧南溥字泉齋華亭人乾隆二十四年順天副榜就職
州判歷署永福等縣多惠政巡撫楊公有老吏之目尋
丁母憂服闋署崇安縣丞兼攝縣事一如任永福時適
總督伍巡撫浦在閩遂謝病歸卒年八十七

蔡源字魯山青浦人乾隆二十四年副榜詩文精詣教
授生徒多成名操選政津逮後人分纂縣志稱詳核工

諫書子寅鍾歲貢生寅初恩貢生

許寶善字穆堂青浦人乾隆二十五年進士授戶部主事歷員外郎中擢浙江福建道監察御史丁內艱歸不出以詩文自娛尤工詞曲著南北宋填詞譜有自怡軒詩草及穆堂詞曲行世

王顯曾字周謨金山人頊齡曾孫乾隆二十五年進士由庶常改主事薦擢湖廣道監察御史晉禮科掌印給事中巡視南漕及巡臺灣前後並多建白移疾歸晚年修華亭志成又自輯家譜年七十卒著有傳硯堂全集雙峯草堂詩稿

王寶序字全初華亭人孝簡先生永祺子也初永祺居望湖涇諸子居貧力作靡事不爲顧讀書不輟已遷郡城北侍父館塾益沈潛力學領郡案補博士弟子員乾隆二十五年掟京兆試第四名考取咸安宮教習三十七年選授湖南醴陵縣引

見調福建漳州府南靖縣四十二年乞養回籍寶序居官清慎鞫疑獄嚴社倉謹鹽筴輯邑乘而最大者在南堰水冲發賑捍隄一事賴全活者甚衆年未五十以奉母乞歸不復出承歡潔養潛心經史百氏之學性靜默寡言終日恆獨坐所居釀街堪鄰人經歲罕識其面晚年

兩目失明猶以經傳口授諸外孫年八十八無疾說得而逝工書法遠近爭藏弄之著有紀程詩百草庭詩文鈔

陸錫熊字健男號耳山上海人秉笏子數歲通經史能究歷代治亂得失之要侍祖瀛齡教諭石埭著陵陽獻徵錄陳壽禮志等書既受知夢文子李鶴峯兩學使中乾隆己卯舉人成辛巳進士壬午

南巡召試授內閣中書舍人乙酉典山西鄉試承修通鑑綱目輯覽直軍機處戊子典浙江試遷宗人府主事庚寅典廣東試游陞刑部郎中辛卯壬辰兩充會試同

考官會

上稽古典學取永樂大典錄其未經見者又求遺書益以內廷藏本薈爲四庫全書令仿劉向曾鞏之例作提要載於卷首特

命偕紀文達公酌任之乃考其卷帙篇第參其同異是非總撰人之生平撮全書之大槩編擬稱

旨改授翰林院侍讀充日講起居注官

文淵閣直閣事累遷侍讀學士擢光祿寺卿晉大理寺卿福建學政補都察院左副都御史先是四庫全書之

成

上命分寫七分度於中外鈔錄其在纂輯校勘非所司至是以盛京文淵閣本繕錄多誤因請一再往校壬子春寒比至奉天卒年五十九錫熊淹雅宏達貫穿古今與聞若璩顧炎武朱錫鬯相上下爲文不假思索在軍機時適用兵金川夜半嘗傳

旨七道援筆立成擬進無一字易己酉春

字聖憲皇后賓天凡大祭殿奠上

尊經典禮嚴重應奉文字無敢爲者于文襄特舉以屬之自四庫全書外若契丹國志勝朝殉節諸臣錄舊五代史河源紀略歷代職官表八旗通志奉

東編輯者又若干卷其他制草及凡有經進之作多出其
手疊荷

嘉獎每歲首

召入重華宮小宴聯句爲儒臣異數著有篁村集寶奎堂
集其提要一編尤可考見學術之該博議論之精萃生
平於讀書外無所好不問家人生產其言呐然如不出
諸口所居口涉園方池老屋不蔽風雨海上薦紳家錫
熊爲最貧云

鍾晉字康廬華亭人乾隆二十七年舉人北游齊魯燕
晉南及甌閩楚粵采奇攬勝悉見諸詩嘗謂詩之取資

者三曰性曰游曰學蓋自道其所得力云著有觀香堂詩鈔明日看雲集道中歌等稿晉同年生陸芝字嶽祥亦以詩文名著有大雅樓詩集

趙文哲字損之上海人父紳工詩善書文哲博瞻多文詞尤工詩賦爲諸生學使夢麟李因培深器之沈德潛刻吳中七子詩文哲其一也乾隆二十七年

南巡召試

欽賜舉人授內閣中書充方略館纂修官直軍機處二十三年坐事論罷會用師緬夷將軍阿文成桂奏令軍前效力以勞績復故官陞戶部主事會小金川構釁逆

僧格桑竄入金川分兵三路進討文哲隨將軍溫福
由西路進駐木果木六月布郎郭宗失守賊匪掩襲大
營取軍籍冊付家人乘閒出同將軍被難年四十九事
聞卹贈光祿寺少卿廕一子人祀昭忠祠所著見藝文志
兄文鳴字宸藻諸生好學不嗜榮利與人交必以誠能
詩工書畫晚年究心地理有清泉詩集三元地理真傳
子秉淵字少鈍以廕授內閣中書 軍機處行走轉兵
部主事出知四川眉州修三蘇祠卹其裔累遷成都府
知府會勦川楚教匪隨大帥著勞勩

賜花翎加道銜性忼慨喜言事急公愛民待戚黨有恩誼

嘉慶十年卒於官秉沖字硯懷由國子生薦直

憲勅殿乾隆四十七年

欽賜舉人授內閣中書以

南書房供奉久歷部科卿寺累官戶部右侍郎嘉慶十九年卒奉

旨趙秉沖勤慎供職三十餘年茲聞溘逝深爲軫惜賞陀

羅經被竝銀三百兩以給喪費卹典如例

上海志

張熙純字策時上海人博學能文與同縣趙文哲齊名

乾隆二十七年舉人

召試授內閣中書充方略館纂修官供職二年卒熙純少

與文哲友善後相失然兩人才不相掩詩清麗拔俗尤
長樂府著有華海堂詩集

南匯志參
湖海詩傳

許吳行字子順華亭人父棠字惠南諸生善屬文工書
法吳行由選貢中乾隆二十七年順天副榜任浙江臨
海縣俸滿加通判銜以公事降調復任廣西興安令丁
憂服闋補安徽南陵縣卒於官吳行治尚寬簡在臨海
時遇海洋命盜巨案悉心詳覈無枉縱鄰境黃巖縣民
有誦經斂錢煽惑愚民事上官疑爲叛繫一株十民震
恐將激爲變吳行奉檄按驗集鄉耆喻以利害令各詣
城隍廟繳經付炬卽不問懲其首餘數千人悉開釋反

側遂安時有爲異行危者異行曰余固知鄉愚無知卽
所按不實谷當獨任勿以累同官也生平博覽經籍購
善本讎校精審尤好文選說文廣韻諸書著有文選筆
記八卷古音表一卷韻通六卷古韻二卷考正說文十
卷天涯仙遇錄一卷醫學王學荃蹄四卷六壬課學天
光閣焚餘著二卷敬恕翁詩稿一卷子懋稼工篆隸
吳省欽字充之南匯人乾隆二十二年

南巡召試

欽賜舉人授內閣中書二十八年進士改庶吉士授編修
大考一等擢侍讀遷侍讀學士光祿寺正卿順天府尹

擢禮部右侍郎調補工部歷吏部右侍郎轉左晉都察院左都御史嘉慶四年罷歸卒年七十五省欽起家詞賦遷陟清華七典鄉闈四督學政爲同考官者三爲副總裁者一詞臣榮遇罕有其比古文堅卓奇峭大要以唐之孫樵劉蛻宋之柳開穆修爲宗詩初學漁洋竹垞後自闢蹊徑王昶謂其意必堅疑詞歸清峻在京師日購地置松江義冢葬同鄉旅覲之無歸者歸田後復置義冢設與善堂施藥捨棺掩埋待親故有恩訖初省欽無子以弟省蘭子爲嗣年七十二生子敬沐能讀父書入邑庠惜年十八早卒省欽著有白華前後詩文稿

喬鍾吳字雲門上海人光烈子以官生領己卯鄉薦乾隆二十八年進士選浙江新昌縣改直隸滿城時金曾跳梁會師進剿滿城當孔道師行不絕供張儲峙事悉辦以軍功加二級尋調遷安旗民雜處聽訟虛衷無枉縱建昌奸民聚眾毆巡檢罪首惡餘勿問所至建設書院振厲文風以卓異赴部時阿文成桂總銓曹謂僚屬曰此直隸第一廉吏也尋陞岷州知州鍾吳官畿輔最久吏民親之去之日泣送道旁行三日始出境抵岷值小山回變日夜守禦賊不敢近題平涼府鹽茶同知念母年高乞終養歸不復出家居葺先祠卹戚族音用廣

施琴書自樂著有宜園詩文集洮南隨筆琴譜若干卷

年六十四卒

吳侍讀省
蘭撰墓志

薛鼎銘字象三上海人父仁本以醫名鼎銘工舉業決

闈試利鈍若合左契操選政風行遠近乾隆二十八年

進士除浦江縣兩充同考官所得皆知名士修邑乘建

十三賢祠著有春餘吟稿

上海志

胡鼎蓉字兆鏡婁縣人青浦籍寶琮子師事王永祺而
與倪思寬陸明睿爲友屢試不售乾隆三十年

欽賜舉人授陝西汧陽縣調武功卓異升山西澤州府同
知署河東運同擢江西贛州府知府署吉南贛道以公

事鵠秩歸遂不出鼎蓉居官廉恕所至無赫赫稱然去
後民見思畢中丞沅農中丞起重其悃悞無華以爲庶
幾古循吏晚主六峯書院六峯久無中雋者甫一年而
解首陳鴻緒卽院中賞識士六人留之十九年生平孝
友待兩庶弟雖處窘乏必周卹之數十年如一日云著
有松溪詩文集

姚念曾字季方金山人宏緒孫乾隆三十年拔貢

廷試一等授知縣歷任湖北孝感應山鄖縣所至著稱擢
署清軍同知被劾歸念曾儀觀偉然覃思著述里居二
十年著有詩文全集二十卷金石考六卷印譜四卷唐

宋詩鈔三十卷卒年五十

徐薌坡字蓀林青浦人乾隆二十二年

南巡召試入二等

命武英殿纂書處行走是年遷入成均入都後梁文定國治尤愛其才嘗主清軍書院居數年歸復入京師病瘵卒王西莊云江左十子錄其詩

青浦志

王嘉曾字漢儀婁縣人文恭公會孫乾隆三十一年進士選庶吉士丁父艱服闋入都授編修分纂永樂大典充四庫館纂修官全書告成充

文淵閣校理續輯金川方略又充方略館纂修官庚子山

西副考官辛丑以疾告歸卒年五十三嘉會風度夷簡
泊然寡營居恆不言靜默至談及經史疑義六書音韻
律算諸法辨析精微終日不倦同時戴東原翁覃溪諸
公無以難也樂成人美揄揚獎借惟恐不及爲文根柢
經史詩賦典贍清華詞垣中未之或先著有聞音室詩

文集

妻志

唐承華原名丕承字旦仲班子南匯人華亭籍力學能
文乾隆二十四年學使李因培以優行貢

朝考第一旋考取八旗教習以親老不赴三十五年舉於
鄉工行草書小楷學黃庭經子祖樾字蔭夫乾隆四十

二年舉人由景山官學教習授山西寧鄉縣知縣調樂平改安邑升順天府通判改授雲南路南州知州署開化府事調補黑鹽井提舉祖懋能承家學居官二十餘年不名一錢歸田後僦居郡城饗殮恆不繼時以爲拙宦詩稿覆舟川江盡失之今所存僅若干卷

姜兆紳字孺山華亭人明太僕寺少卿雲龍七世孫乾隆三十五年恩科舉於鄉考取景山官學教習用大挑選舒城縣教諭有文廟歲久傾圮兆紳倡修之大於前制歲旱議賑兆紳司其事力除冒濫諸弊縣當孔道例起夫役胥吏緣爲奸兆紳議以四鄉之民輪次應

役願雇募者聽邑令用其說至今稱便乞養歸未一年
父母相繼沒慟不欲生既免喪終身不肉食性孝友和
易近物學者嚮之於諸經皆有發明於孟子用力尤深
成孟子篇敘七卷晚年專以郡之文獻爲事著有松江
明末忠節錄二卷松江詩鈔六十四卷

吳樹本字芸閣原名斯婁縣人元龍曾孫少孤勵志沈
潛嗜學乾隆三十六年成進士改名敬輿由庶常授編
修改今名會大考翰詹擢侍讀學士充日講起居注官
教習庶吉士歷典陝甘湖北試充鄉會同考官順天武
闈正考官乙卯福建副考官未入闈以疾卒於途年五

十七樹本詩文爾雅深厚生平於漢儒訓故及說文小學諸書疏通證明皆有依據官翰林久凡有撰擬及扈從廣和恆邀

睿獎保送御史十載不遷未嘗一謁要津及膺

特擢出自

主知論者以爲榮遇性孝友弟嗣宗病癘百治不效樹本每旦禱神額爲墳起病竟獲痊同年桂林朱篠庭病沒京邸竭力經紀歸其櫬中表王聲中以遺孤託摒擋婚娶時卹其家諸風義類如此著有清容堂集弟孝顯字季揚乾隆四十六年進士官國子監學錄轉助教遷宗

人府主事充 四庫館詳校官壬子同樹本分校順天
鄉試郡自康熙中王九齡鴻緒兄弟之後未之有也癸
丑充會試同考官所得皆知名士生平好學與人交謙
挹若不及說經宗漢儒他子史金石之學鉤稽博奧蓋
與樹本夙事沈大成爲得其傳云著有清真閣集

徐長發字象乾上海人乾隆二十五年舉人戶部司務
三十六年成進士授兵部主事轉員外郎歷四川建昌
道以軍功

賞戴花翎自壬子後勒布不靖長發奉檄駐打箭爐等處
督儲胥二年繼以廓爾喀滋擾出師致討又總理郵傳

饋餉往來察木多拉里諸險隘並著勞績年踰七十告

歸著有寒玉山房詩鈔

上海志

姜曦字心葵華亭人乾隆三十六年舉人以教習官懷
寧教諭巡撫朱文正公奇其才保舉爲江西永新知縣
邑人許青奇欲占吳方谷山場會胡國華與吳鬪毆搆
訟許遂毒死胡嫁禍於吳曦驗視盡發其奸許以三千
金行賄立斥之許別爲道地遂不得於巡撫某檄解軍
餉比歸丁本生父母艱踰年卒所著條例約編七十八

卷

寶山李保
泰撰墓志

施潤字澤寰上海人維翰曾姪孫乾隆三十七年進士

以母老就鳳陽教授板輿迎養丁憂歸當事者延主敬業書院著有居敬堂詩文稿

上海志

王春煦字紫宇婁縣人父心渠字子勤金山衛學生乾隆九年以五經中式副榜於學無所不窺尤邃經義游京師名公卿爭延致之砥節敦行遠近稱長者年六十三卒春煦少有神童之目爲文工而速年十四補府學生以拔貢中乾隆三十三年順天鄉試四十年成進士二甲第一名

朝考第一改庶吉士授編修掌院阿文成桂嵇文恭璜器重之館閣撰擬文字多出其手充癸卯己酉順天鄉試

同考官庚戌會試同考官教習庶吉士擢河南道監察御史署吏科給事中授湖北宜昌府知府請

訓陞辭

高宗純皇帝命和

御製詩一首春煦赴軍機處援筆立就

天語嘉獎蓋春煦官翰林時奏御文字每稱

旨早知其名洵異數也宜昌爲川陝門戶萬山叢雜嘉慶元年川楚教匪滋事春煦圍練鄉勇且守且剿賊首林之華等聚衆二萬屯據長陽縣之榔坪遊擊邱作訓知縣黃應文赴援被害春煦僥道疾行至長陽率練鄉勇

等守孤城者六閱月殲賊無算城卒獲全大帥上其功
奉

旨陞用五年四月卒於官年五十七追贈道銜

賜祭葬廕一子宜人思之祀於黃陵廟中著有延青齋詩
文集

姚令儀字心嘉婁縣人乾隆四十二年拔貢

廷試一等揀發雲南試署祿豐易門及尋甸州有賢聲時
福公康安移督四川奏以從自縣令歷官至布政官績
皆在川中其任石砭同知時從將軍鄂輝進討西藏廓
爾喀兵行人迹不到之地洹寒巖谷儲峙悉辦會鄂公

以罪降而孫公士毅爲督福公爲大將軍皆以書招令儀以既許鄂公從之不去任事彌力

上聞而義之

賜花翎擢知府其後川東湖廣民相繼扇亂福大將軍檄往軍中事率與謀言無不盡大將軍與人毆都司徐某於營門叱止之不聽乃杖斃之又從威勤侯勒保勦達州餘匪承鞫俘囚開釋株連者無算功成寇殄全川以寧知成都府時歲禮請發倉粟設粥廠以食餓者及任按察數月清釐積案六百餘起擢藩司二年以積勞失血而卒年五十六生平持身廉而厚施於族黨故舊尤

善識拔人如方公績傅公鼐皆由薦引爲一時名宦少

能文工書至老不倦

姚姬傳勳
撰墓志

吳省蘭字泉之南匯人省欽弟乾隆二十七年舉人官
國子監助教四十三年會試

欽賜進士改庶吉士授編修大考一等陞詹事府正詹事
歷官工部左侍郎降補侍講陞侍讀學士視學湖南時
江省同知李焜怙撫軍勢虐生員與大獄而原籍有子
弟與試者輒以私書請託省蘭入奏李論戍人稱其持
正性彊記與兄省欽齊名著有奏御存稿藝海珠塵

徐大容字莪泚婁縣人乾隆四十四年舉人沈靜好學

詩文爲沈大成入室弟子當陸副憲錫熊纂修婁志時
倚以集事錫熊總理 四庫全書凡延閣曲臺之藏皆
其刊定而大容學足以佐之又當時書出一手不爲衆
議所撓且寬其期程故全書典核詳贍較他志爲勝云
著有拾是集四卷

王觀字耀鴻華亭人明副使明時六世孫少孤力學爲
諸生日益有名教授生徒奉母色養諸城劉石庵相國
時爲學使深加甄賞乾隆四十五年始舉於鄉一應禮
部試不遇游齊晉登覽河嶽歸而杜門自編其歷游詩
曰偶唵稿文曰綺雲堂稿卒年八十

陸伯焜字仲輝青浦人乾隆三十八年

東巡召試

欽賜舉人四十五年成進士改庶吉士授編修乙巳大考
第一陞侍讀學士辛亥改吏部員外郎累遷鴻臚寺少
卿擢江西按察使調浙江旋引疾歸卒伯焜少以詞賦
稱及入直 軍機留意朝章典故金壇于文襄倚重之
著有玉笥山房詩鈔

程維岳字申伯金山人嘉善籍乾隆四十五年進士由
內閣中書歷官山東道御史前後行走 軍機十餘年
爲阿文成公所倚重分校禮闈稱得士充

萬壽盛典館提調兼方略館總纂 盛京通志遼金元史
南巡盛典薩拉爾臺灣巴勒布等紀略皆與編纂事嗣母
錢本生母張以孝稱丁本生母憂歸歷掌大梁叟東書
院廉俸所餘購書至萬餘卷所著松笠齋詩墨事類撮
華觀我閣古文唐詩彙選

陳廷慶字兆同奉賢人文莊十世孫乾隆四十六年進
士選庶吉士改戶部廣西司主事充山東鄉試副考官
晉員外郎出知湖南辰州府在任葺虎谿書院以育人
材修龍門大橋以便行旅躬親讞牘不以飲酒賦詩廢
公事尋薦堪陞道員未引

見丁父憂旋里服闋以母年高不復出廷慶爲人坦率無
機鉗於翰墨有結習愛賓客薦引孤寒書一日百函無
倦色蕭山令侯官林鳴岡爲孝廉時客幕中資其入都
罷官後流寓武林恆調卹之沒後爲位於西湖淨慈營
齋奠力歸其櫬踰嶺反葬同年生李深源亡後妻子不
能自存爲經紀其衣食十餘年此皆爲人所難耽詩善
書少以簾鉤詩得名晚所作益進書法初師趙董後專
學晉人出入鍾繇象閒世亦未之識也初廷慶喜爲
汗漫游在西湖有道士求署元慶山房榜爲易圓慶二
字嘉慶癸酉復游武林觸暑熱忽遽僦居山房遂卒年

六十著有謙受堂詩文集法帖集古錄若干卷

沈步垣字薇軒婁縣人乾隆三十六年順天舉人授內閣中書四十六年進士由庶吉士充

武英殿纂修三通館協修甲辰改刑部主事陞員外郎擢浙江道監察御史稽查興平倉掌京畿道巡視南城署吏禮二科紛事中性至孝自入詞垣卽迎親入都服官十四年丁外艱歸里服闋遂請終養歷主大梁鍾山敬敷雲間書院工篆隸卒年七十四

王錫奎字文一婁縣人興堯子乾隆四十九年進士改庶吉士授編修充

英殿提調官戊申分校北闈壬子與試湖北癸丑會試
同考官冬出知安徽潁州府未一載以母憂歸松太道
李廷敬聘主敬業書院旋卒錫奎家世貴顯父興堯在
籍頽豪侈園亭絲竹甲於一時顧少年卽耽讀不爲裘
馬冶游之習人以此器之工篆隸兼通樂律音韻在詞
垣十年最爲稽文恭器重著有荔亭詩鈔

張位中字立人上海人宣化籍祖成字修己乾隆三年
舉人著有萬竹居詩稿位中乾隆五十四年進士知四
川射洪縣廉能爲蜀令最俗惑妖祀位中予大杖風稍
息嘉慶五年教匪江北川其黨由新寧梁山竄大竹位

中被檄署縣篆方葺雉堞撫流亡部署未竟而賊虜至
時將軍魁倫所遺兵纔五百位中率團練兵出十里禦
之斃數十人又親射殪一豪帥卒以衆寡不敵死之事
聞予卹廕如例入祀成都昭忠祠特祠在大竹碑樹東獄
廟側卽位中殉賊處也

康愷字飲和上海人乾隆五十七年舉人天資高邁詩
文刊落繁蕪以矯健勝書畫自闢門徑而畫學尤深其
卒也李觀察廷敬哭之以詩有忍病尙剛鎗下史救貧
惟賣畫中山句著三研齋詩鈔

唐晟字采江華亭人乾隆五十七年舉人由咸安宮教

習期滿選授山東范縣以廉謹聞嘗修閔子墓及左伯
桃羊角哀墓蒐輯縣志調滕縣以事註誤旋開復回任
會曹縣教匪滋事屢召募鄉勇旦籌軍儲夜嚴巡徼以
勞卒於官

顧元龍字寶光青浦人明德五世孫天桂子弱冠補博
士弟子員瀏覽經史著聲譽序性淳慤言動一循乎禮
歷試優等好學不倦嘉慶戊辰

欽賜副榜癸酉

欽賜舉人著有曉江詩稿

姚伯驥字勝符南匯人嘉慶十二年舉人潛心正學座

右皆書格言邑中育嬰濬河清查義冢諸事及故人有
求援者雖窘乏必典質應之而後安著有五經劄記

朱椿字大年婁縣人祖琦以軍功歷官鳳翔府知府有
善政椿幼失怙恃能自立入貲以通判注選時建海塘
石工以勞議敘授湖北荊州府同知旋擢浙江金華府
知府廣義倉興社學有士人貧不能娶與婦家訟椿命
於公庭成婚禮義烏民墮水死其族子借以誣所讎椿
至白其冤陞溫處道被議起授湖北驛傳鹽法道裁水
驛以省勞費疏調引鹽以寬商稅築黃梅江隄以禦邇
陽水患遷廣西按察使時上林民角里能等煽惑愚氓

劫掠拒捕賊氛甚熾旋就縛椿手定大獄誅極兇惡而
被誘株連者得末減全活多人不市月信讞定

上益信其才後

廷見屢詢及之轉雲南布政使會土夷遷入內地日糜官
廩椿慮其生息繁衍游手爲患議請貸官錢以謀生而
編精壯入營伍得

旨嘉納滇南多曠土椿著江南農具圖說頒郡縣民便之
改廣西布政使陞巡撫嚴重廉靜屬吏翕服旋以兵部
侍郎

內召遷都察院左都御史八年之閒中外遷轉者凡六乾

隆四十九年卒於官

妻志

張國珍字寶廷金山人父志英樂善好施潛德勿耀國珍由縣丞發四川補重慶府經歷調屏山縣縣丞頻攝縣事皆有治聲乾隆四十二年授滿城縣百廢俱修葺玉川書院濬大柵河修漢張蒼祠邑孔道歲役繁困國珍於例支外又日給米一升民大悅肖像方順橋尸祝之四十六年

高宗純皇帝西巡接

駕稱旨

賜綺四十八年治涑水道

道內大臣傳詢官職姓名

賜綺如前皆異數也調繁東安旱蝗為文禱之不為災有
倪三林子者以財橫鄉里數以贖逋罪至是毆其季父
或為居閒國珍峻拒按律擬上上官再三詰國珍爭益
力卒遣戍以年逾七十投劾歸

陳文錦字彩重奉賢人官四川成都通判大府知其能
委監夔府榷務夔稅每年缺額文錦清釐積弊課遂贏
旋檄督理寶川局嚴爐頭匠役毋敢以鉛錫參鑄署郵
縣事地當孔道往來者借民閒贏馬文錦捐俸廉請添
設馬站郵人德之卓異陞打箭爐同知其地卽前明松

潘衛爲西藏出入門戶時值軍興文錦籌畫儲胥轉輸餽餉目不交背者數月以勞成疾臺使矜之量移潼川力疾抵任卒於官

朱秀文字綺遜婁縣人諸生官廣西柳州府通判屢攝州縣事所至著稱歸里後倡建郡城普濟堂子履吉字旦銘年十八省父粵西明習吏事官貴州施秉縣知縣會緬夷平定經理善後事宜往來絡繹並先事籌備民不擾而事辦大府以循良薦一夕心動卽投牒歸父已沒哭踊柩前死而復蘇旣卜地白牛塘風綫雨沐營辦葬事積二年復建祠置祭產服闋以生母年高不復出

母沒痛不欲生咯血數升卒於苦次臨終書示諸子云
遽云寡過曾曰省身五十五年勉服於膺春朝撒手去
仍作打包僧一片寒松裏慈烏喚我曾人稱孝謹先生
子光曜子鄂竝諸生知名

張大金字舜巖南匯人由例貢授刑部主事遷郎中明
習律法遇外省題咨案件悉心研覆有矜疑者力白平
反甚多西曹倚之委辦總理秋審 京察一等以道府
用尋移病歸大金官京師與范芑野給事曹劍亭侍御
商建雲閒會館朝士多與之交雅工翰墨歸里後好行
其德年六十餘卒

南匯志

凌存淳字鯤游上海人附貢生充則例館曆錄乾隆十年授廣東雷州府同知初攝番禺篆巡撫岳濬吏倚勢奪民田立笞之以白濬濬亦痛懲吏且曰凌君健吏也後累攝各府篆率諸屬不厲而嚴善決疑獄以母老乞歸杜門謝客好吟詠能擘窠書年六十八卒子鏡心松心竝諸生以學行世其家

上海志

周乘柄字操文南匯人由例貢官陝西通判署郿縣性嚴峻吏胥無敢欺顧不爲刻礮民愛之邑故有橫渠書院年久廢爲公廨乘柄捐俸修復延師講學其白再署岐山岐民戴之如郿以病假歸卒

南匯志

楊汝璉字景商婁縣人官陝西布政司經歷改河南用
卓異薦得

旨待擢中風疾自免在河南長官惡家奴下經歷司推問
將傳以法汝璉不可曰法以治民不當自便署有樓相
傳有鬼物不敢居汝璉啓鑰信宿其中竟無他攝開封
同知監稅朱仙鎮宿弊一清部民聘婦將婚婦家忽背
約汝璉曉以大義卒成禮及解組歸有同官郎正達贈
以金始辦裝汝璉生平嗇於取而博於施當時勝流曲
阜孔繼涑杭州陸飛嘗主其家晚游豫章吳越其故舊
相與致橐中金不受祇取異卉古書數種以歸浸淫卷

軸至老彌篤著有消寒隨意錄豫游日記石言藏於家
張孝煜字炳南婁縣人父忠當有用世才孝煜曉暢吏
事以宛平籍入監注選縣丞需次南河補山陽主簿調
清河河帥白鍾山器之將入薦固辭以事奪職起礪山
主簿會有欲壞隄生事者以孝煜能因屬之孝煜謂隄
壞魚鼈者且數萬人奈何以數萬生靈糜數萬帑項不
奉檄後卒如其言而孝煜先以他事劾矣在山陽有訟
子不孝者廉其貧出棒錢與之後其子竟以孝聞年七
十一卒於家著有恆齋詩鈔二卷

陳韶字九儀青浦人由館學生議敘理問攝台州同知

會臺匪林爽文滋事奉檄帶台兵五百名赴閩師行不
緩還攝寶浙局不名一錢乞病再起署烏鎮同知懲治
土豪申理冤獄循聲大振改署紹興府同知卒年五十
五韶少以花南詩得名同邑王侍郎昶稱之因號花南
著有花南詩集五卷梅莊小志二卷重編天台山志十
二卷善畫山水曾自繪歷游名勝圖冊百幅

胡傳書字思荻青浦人格靖彖孫由廣東海陽丞歷官
新安縣知縣轉饒入都經江右被盜竊行資撫軍某以
嫌劾之擬謫軍臺子勳堯赴部訟冤當事以

聞覆案得白嘉慶二年從軍粵西歲事捐復原官授山東

樂昌令調掖縣遷東昌同知卒於任傳書爲人彊力有
執所至以能稱長子勳堯嘉慶十四年進士國子監學
正早卒

馬汝良字載白華亭人善馳射由行伍歷陞貴州安籠
鎮守備乾隆三十一年

大軍征緬甸從參贊侍郎珠魯訥進勦汝良遇賊手殺二
十人賊伴敗孤軍深入投於陳

恩賜祭葬入昭忠祠世襲恩騎尉廕孫念椿把總

華亭志

馬世華字蓉江華亭人由戎伍歷官貴州安籠鎮守備
汝良從征緬甸酌酒送之勉以努力前驅忠勇自效乾

隆三十八年世華應調金川擢樺林營都司隨

大軍屯美臥溝奮勇殺賊旋移兵木果木賊衆大至戰沒

恩賜祭葬入昭忠祠世襲恩騎尉

華亭志

吳震字東安弟光烈字西藩華亭人諡節愍嘉允六世
從孫震乾隆十八年武科舉人候選守備光烈庠生父
天麟爲仇家所陷將名捕傳以法兄弟知事急共謀以
己命保父餘年用計賺天麟游金陵吏求弗得逮震震
就獄詰父所在嬰三木終不承兩足潰爛旣而曰某願
代父罪餘請不問也吏哀其志卽以震題參擬抵旣天
麟自金陵投獄光烈徒步走百餘里刺臂血上書願以

身代時制軍尹中丞莊覽詞惻然許以題請遂詣獄親
父獄吏索金倉卒無以應解佩刀斷左手食指二節與
之吏驚歎引之入次日震至而父喪適出凶問至家
許楊亦一慟而絕時稱兩孝子復有孝女云天麟事後
得昭雪邀 贈典震後官廣西都司著勞績光烈佐大
府幕有聲震子長灝割股療兄光烈子時英庠生亦以
割股救父聞

陳得功字立奇先世自南通州遷華亭得功署名行伍
由把總歷官甘肅靖逆營守備地處極邊寇不時至得
功嚴爲之備嘗出巡遇伏率麾下力戰身被數十創得

脫調征金川奮勇深入冒矢石仰攻奪礮卡數座以任提督沒於陳不得敘功後乞歸白龍潭上破屋數椽蒔花種柳與朋好過從酒酣談及往事輒解衣指示瘡痕年雖老而意氣忼慨如見其躍馬臨陳時也卒年八十七

徐延齡字景遐華亭人甘肅寧夏籍明刑部侍郎陟八世孫乾隆庚子成武進士歷官商州游擊嘉慶六年在陽平關堵敘匪陳亡奉

旨賜祭葬入昭忠祠世襲雲騎尉翰林院立傳同時有孟景元上海人江西南昌營守備鍾德華亭人直隸涑水

營守備葉炳銓華亭人陝西興安鎮游擊竝以勦捕教
匪陳亡 卹典如例又有雷震華亭人乾隆癸卯武舉
姜林上海人提標右營千總竝以巡洋遇盜戕害 奏
准援陳亡例

賜卹

楊履基字履德金山人博學多聞歲科試輒高等學使
李鶴峯以優行薦屢試不遇卒履基於諸經解義兼綜
條貫然不爲門戶攻擊之習詩文亦蒼深有骨同時王
昶陸錫熊皆重其學晚歲教授浦南學徒甚衆稱爲鐵
齋先生著四書易詩書劄記春秋四傳傳疑三禮臆說

親理編律呂指掌圖鐵齋文集蘭谷詩草行世

曹錫端字松畦上海人給事中一士子由廩貢授銅山訓導未赴改江寧會開四庫全書館省立書局令總理其事捐俸重購學舍諸生勒碑記之著有半涇園詩

餘行世

上海志

陸友松字鶴儔青浦人張湘子諸生刻志勵行嘗著克伐怨欲四箴以自警三十喪偶不復娶居家嚴肅雖盛夏不袒年六十卒生平見學者不務切近先求高遠或更矜奇衒博務爲剽竊模擬之功以爲此不特學術既乖而人心亦壞語皆中時病臨沒指座右聯示其子曰

生平受用惟安命第一工夫在謹言子旭初諸生專心理學制義外兼工詩古文詞著有敬亭詩文集

邵玘字桷亭青浦人附貢生未冠補博士弟子員在紫陽書院有聲沈歸愚宗伯時爲山長極延譽之一時名流盡替倡和屢試不售游河南復客楚中輯桂陽州志歸葺園林跌宕文史四方名士造訪者接軫焉自著詩文及雜刻數種詳藝文又刻亡友遺詩二十八卷名懷舊集行世年八十四卒

湖海詩傳

張夢喈字鳳于婁縣人父維煦兄夢徵並有傳夢喈夙承家學乾隆壬午乙酉兩遇

爲南巡學使劉墉李因培先後選應

試不得志以貢入貲候選同知性和易信然諾篤內行
詩本漢魏三唐掇其精英自臻佳境竝工詩餘年七十
四卒次子興載以廩貢官新陽訓導亦工詩賦著有寶
禊堂詩文集

陸範鏞字季巖青浦人慶臻曾孫與同里王侍郎昶以
詞賦相切劘詩學三唐駢體宗四傑昶輯青浦詩傳亟
稱其詩書學率更畫山水出入倪董同時有岑昌裘沈
金城咸負文譽皆以歲貢終金城子曙字賓仲乾隆戊
子舉人選授廣德州學正

顧道字萼咸華亭人爲諸生屢試冠軍學使莊有恭按
試甄錄謁見時以文式多士爲朗吟終卷一堂聳聽以
明經補溧陽學博課士有法歸教授里中綴文之士操
鉛槧就徽墨得其傳者後皆爲名師暮年尤耽著述同
時盛照字玉山少躬耕三十餘始讀書執筆爲時文一
月游鄉校以貢入國學教授生徒甚衆著鴻湖詩草
諸煌字東宿婁縣人乾隆十八年選貢生學使者雷銓
稱爲學行第一教授生徒具有模範王太史嘉曾孝廉
憲曾皆出其門晚年與沈大成徐王昱朱龍鑑諸人爲
十老會大成爲文紀其事後有郁兆桂字良補歲貢生

工書金平成字抑洪歲貢生工詩嘗以白牡丹詩得名
錢庭桂字秉巖廩生與文學金漢陽竝以學行爲時所
稱

姚昌銘字耘上金山人歲貢生工詩風格每變愈上性
迂怪不諧時俗後遇崇卒臨終自爲挽句云住世五十
九年數盡於此作詩一萬餘首樂在其中始解脫者同
時彭金華字擷芳貢生亦以詩名著有藝香閣詩鈔二
十卷

姚蘭泉字栽亭南匯人貢生工詩善書嘗入都王蘭泉
昶吳白華省欽均愛其才著有秋塘遺稿三卷後同邑

蔡文鈺字書巢朱鳳洲字紹堂好學工詩俱早世

焦文達字少游金山人以敬子爲諸生才氣豪邁著研
溪偶存草兄紹祖官化州知州以非罪被議自盡家籍
沒文達匍匐營救請於當事復還此木軒故居及門多
知名士論者謂南浦一脈文達克繼其緒云

汪志毅字健行金山人與弟騰鳳竝孝友嘗置祭田倡
興張堰鎮同善堂堵築朱家溇高蔣涇堰輯有宗支家
約理學粹言童子登瑣言彙錄粹皇極經解劉念臺人
譜傷寒經注行世騰鳳字庚旬歲貢生博覽羣籍多所
考證早歲爲莊中丞有恭所知著兩漢發微二十卷詩

學質疑二卷行素堂文集八卷子夢雷字綠書廩貢生
工詩文著有寄園吟草十卷

倪思寬原名世球字存未華亭人恩貢生師事王永祺
爲高第弟子於十三經注疏子史百家天文經緯度數
古今郡縣沿革山川形勢靡不條貫兼精律呂音韻九
章算術休寧戴震同郡沈大成王嘉會咸推重之詩文
醇茂典雅不徇時趨己亥試南闈已中式以房考力爭
定元啓主司疑撤去旣貢成均當事欲以四庫館纂
校薦力辭不就孝友端謹於交游不尙聲氣同郡徐希
曾潛心性理人無知者思寬表章之希曾無子臨沒出

所輯朱子羣書要語屬校訂并以藏書數百種贈思寬
悉卻之而忠其所託晚年課徒太行之麓遵白鹿洞遺
規造就甚多平生於濂洛關閩諸書領悟精微尤服膺
小學近思錄嘗謂及門曰工夫切要在動靜語默反觀
內省不在多言視力行何如耳學者稱爲二初先生著
有讀書記十卷經籍錄要十二卷文選音義訂正八卷
二初齋集十卷算法五卷

陸明睿字若璿華亭人諸生沈靜博學自六書訓故以
至經史百氏旁及通典通考諸書兼綜條貫不爲耳剽
目僣與倪思寬齊名所居竝在北郭人稱倪陸二先生

純修端謹不慕榮利所著劄記二十四種論者謂與容齋隨筆黃氏日鈔並傳尤工分隸晚年自作無聞生傳讀者悲之。

何一碧字涵清奉賢人年十五補博士弟子員第一學使張公以大器目之文宗歸胡詩學陶韋尤潛心經義於漢宋諸儒經說悉心研究歲科試累第一經解詩賦使者鏤其牘以行以貢入太學著有五橋文稿五經說前後二集四書匯參補遺論文一卷子二淳能承家學乾隆庚戌貢成均著有瓶城詩文稿及詩餘

徐令銜字維筮婁縣人歲貢生師事蔣志說弱冠餼於

庠屢試冠軍詩文瀟洒雅好碁爲范西屏弟子父欽病篤日夜顛天願以身代繼母葉患痢令銜年已老與妻侍湯藥衣不解帶月餘母沒竟以哀痛嘔血卒志說丙子副榜以文名

陸思誠字希正上海人歲貢生爲文雅潔入理泓然與人交不設城府晚歲鈔書自課小楷盈篋所著見藝文

志

上海志

韓昭松字雪亭奉賢人歲貢生家貧力學屢試不遇手鈔書凡二十餘種著易義闡又有續萬姓通譜及詩文若干卷與同里顧棟善棟字夔聞亦歲貢生敦氣誼飭

廉隅詩文深厚不及昭松而超逸過之蕭塘能文者必
推韓顧云

毛肇烈字載揚上海人湛深經術尤工時藝歲科試七
冠其曹學使謝金圃先生於肇烈謁見時賞其文甚至
自謂不及焉高才不遇不及序貢而卒士林惜之

褚華字秋芎上海人邑廩生負異才舉止清狂不修儀
節家貧日西方爨顧得錢卽付酒家有飲之者終日不
言去詩原本六朝五言樂府最工近體亦格律深穩近
日詩人無出其右嘗輯澤國紀聞滬城備考足備一邑
掌故云

王錫範字敘三奉賢人父丙熊字淮南乾隆二十五年
舉人錫範少敏悟爲諸生累試高等稱一黷之雋生平
於十三經注疏及宋元諸家經說抄撮甚富而一衷於
御纂故其說不持漢宋異同詩亦有雅音

杜昌意字載茲隼縣人明工部尙書士全五世孫以諸
生入太學能爲章奏治官文書幕游五十餘年聲望卓
然嘗客晉撫署中時 四庫館開奉

旨直省采訪遺書昌意暇卽繕閱中丞意不憚謂曰此豈
公事邪昌意曰此卽公事也某籤出數百條皆非所宜
進中丞因以書送藩司大興朱文正公覆勘文正歎服遂

與訂交在畢中丞沅署時幕下士皆通材盛詞藻顧見
昌意文行高潔悉斂衽推服生平恆於孝思以母老近
就本省督署時一歸省母沒得視含斂喪葬一準於禮
館穀所入悉以資宗族親黨每自致窘乏晚館上海道
署卒年八十昌意雖習刑名家言而立心行事雅近儒
者在江省二十餘年人未有干以私其素行蓋上下久
孚云

盛灝元字蔚占華亭人爲諸生有名屢試不第幕游福
建河南佐刑名所主多賢有文勸之作陰德多所補救
晚歸猶時出近游所至訪尋古迹流連山水侶悵風華

作爲詩歌每變愈上著有宜齋詩鈔

楊世淦原名基豐字紹曾華亭人十五入邑庠尋食餼讓產於兄兄亦時濟其困乏有執友緣事成伊犁其母以次子勢不能送兄孫未成立方悲病不欲生適世淦往慰因奮然力任遂送至嘉峪關而還入太學應南北試不售復游幕甘肅年五十一卒於甘涼道署子之顯諸生年十八走七千里歸其喪畢中丞沅重其孝且才之著有劬窈山房詩稿次樞諸生入太學嘗課徒於鄉半載卽歸告母曰其家貧甚不能具先生饌矣旣而知其善學柳下惠云

張寶鎔字花農婁縣人父孝瑛諸生著有餘齋詩鈔寶鎔嬰學生母盛邁疾露禱北斗五載旣而父又病稱水旱藥洗滌廁踰凡十三年少擅詩賦每試學使者第高等幕游江淮閩越管書記所至以詞翰稱著有牀山堂集無錫楊芳燦序西泠唱和詩錢唐吳錫麒序年六十八卒錢唐梁侍講同書作傳哀之

黃烈字右方上海人父中松著有詩疑辨證烈博覽羣籍肆力於古大家文每學使至以第一待之肄業紫陽書院爲彭尙書啓豐甄賞時方博采遺書尙書屬烈校讎家世治經烈尤覃精研思歷五十寒暑無閒王光祿

鳴盛常遺書往復訂證所著詳藝文中子元吉諸生克

世其學有詩經遵義十卷從子爾金亦能文

上海志

葛維嵩字厚卿婁縣人貧居塊獨壯歲游關中歷二十餘年歸僦居僧舍惟以詩爲事土銜無朝煙不知也年七十餘卒友人會葬之著有蘆坪詩鈔行世

松江詩鈔

王忻字景炎上海人諸生詩初學西崑體一變爲清蒼刻露錢唐袁子才同郡王蘭泉亟賞之四十後學益進

縱酒得疾卒著有松南草堂詩稿

上海志

王嘉璧字瑤峯原名天擎華亭人諸生初與張太史夢徵倡和夢徵重其品學晚年與王給事顯曾修華亭縣

志人謂其簡率則以顯曾之論謂府志宜詳縣志宜略

耳著有爨餘詩稿十卷西山臬十卷

松江詩鈔

吳鈞字陶宰華亭人懋謙曾孫性孤癖見人無寒暄問窮搜祕籍刻苦爲詩文生平未嘗應試所居賢游涇上顏其室曰梅花書屋風鈔雪纂冷韻蕭然詩不襲雲閒舊派詩餘尤工篆隸入古摹古名印雖吳亦步蘇嘯民未之或先著有獨樹園詩稿鼠朴詞年逾五十遽卒又嘗搜輯郡人詩名松南清氣集詞名咒桃集今俱散佚同時翁春居采花涇家貧不能就傅過里塾聞村師教讀卽能背誦師奇之因教之讀後師事沈大成詩古文

詞得其指授孝養其母終身不娶與鈞稱二布衣沒後門弟子相與葬焉著有賞雨茅屋詩四卷

莊師洛字蕁川婁縣人諸生嘗增輯陳黃門集撰成年譜營祠墓夏考功集久無傳得其子完淳所著詩文若干卷竝輯以行世所著十國宮詞已梓其自定詩與吳詩集覽刊誤唐賢三昧集補注宋詩集評皆藏於家

李錫勳字瑞五婁縣人生有枝指年十二補婁學生屢試冠軍時文與馮大淵齊名工詩善書學士吳銘茶家居見其文歎爲後來之秀年未三十以羸疾卒同學輯其遺詩若干首爲蒔花居詩存陸副憲錫熊序以行世

大淵字華渚乾隆癸卯舉人

張星會字健行華亭人諸生早歲喪偶有一子不再娶
捐田以供祭祀建祠以合宗族晚年於墓田丙舍構白
雲庵讀書其中長齋禪誦庵有八景名流題詠甚多後
示疾端坐合掌而逝幾於古德焉著有住春園稿

松江詩鈔

顧世傑字謔天婁縣人諸生幼多疾三十外始入學性
仁厚樂施予爲文尙簡勁朱芷湄有細筋入骨之評注

尙書禹貢便蒙有一齋詩鈔

松江詩鈔

閻邱廷俊字克章南匯人歲貢生績學能文尤邃於易
游其門者甚衆敦義行有名家子因貧鬻爲人奴聞之

瞿然竭力營辦代償其價俾得歸復祕其事友人壻竊古銅器一枚去友知之返其物廷俊不承堅卻之其居心忠厚類如此廷俊乾隆丙辰元年入南匯學恭逢

恩詔廣額至嘉慶丙辰元年歲試重逢

恩廣再游泮宮咸以爲耆英瑞事年八十卒

盛爨謨字周鎬華亭人諸生居貧力學砥厲廉隅足迹不入城市生平邃於易義詩以少陵爲宗著有東園夢草

陳遇清字確士奉賢人儻有經濟才弱冠入邑庠後貢成均樂善好施一如其父基奉賢爲華亭分縣未立

賢舍遇清請於邑令劉伯璵首捐千緡倡建親董其事
二年始成又念世父安仁所置義田族繁不敷支給復
爲捐置生平喜交游重然諾訓其子廷溥廷慶成名乾
隆五十九年卒

徐自立字輝山婁縣人陟裔孫同祖兄瑾老而無子自
立悉以己產授之幕游寧夏遂家焉願恆寄資財葺宗
祠修家譜人謂其不忘本以子與蕃貴封如其官與蕃
字佳培國子生援例授知州借補廣東南海令居官以
慈惠稱

婁志

侯昌朝字煥廷上海人國學生性伉爽家業裁足衣食

乾隆乙亥歲饑昌朝首倡捐米千石專廠煮粥以濟上
青嘉三邑飢民破其產不足乞叔母趙助成之趙恚誣
以事訟諸官昌朝憤遂自刎死妾朱氏白其冤巡撫莊
有恭陳宏謀先後憫之給額嘉獎并具題請敘奉

旨追贈主簿銜妾朱氏後又捐田二十畝助南翔鎮育嬰
堂成昌朝志也學使李因培給額旌之

上海志

宋源岷字月江奉賢人國學生闈試薦不售幕游粵東
兩載歸會邑令劉伯燠創建文廟令董其事踰年落
成源岷力爲多生平於義利之辨甚明內行尤謹四百
餘年遠祖墓田爲族人私售捐資贖回歲時上冢他善

亭尚多著有吳峯詩章

莊四得字思謙奉賢人父肇龍有陰德嘗與陳遇清倡
建學宮四得承父志一再修葺乙卯歲饑出藏粟煮糜
施賑又分建宗祠於南橋捐田千畝贍族吳門彭尚書
啓豐同郡許侍御寶善各爲之記其他寺廟橋梁書院
靡不贊成善舉卒年六十四子程鷗己酉拔貢以直隸
州判署汝州同知程鵬廩貢生候選訓導先卒

周士堂字榜園奉賢人諸生刻志問學孝養父母性喜
周急三黨之貧乏者賴以舉火乾隆乙卯己亥兩遭歲
饑士堂倉無儲粟竭謀煮粥以飼餒者中年嬰瘵疾猶

手不釋卷著有春秋述志錄樗園詩草

錢載撰
墓志

喬仲餘上海人與弟在修能以甘旨養其父顏色或不
嫌跪請曰奉養無狀惟大人明示以圖自新父曰於我
良足獨念爾伯父窮苦耳於是迎養之如父

上海志

于公桓南匯人家饒於貲有沈姓者避債傭公桓家聞
債主至欲以身鬻書券呈公桓因代之償還其券又嘗
託人持布直可數百金往三衢貿易歸稱覆舟無存或
疑之公桓坦然置不問子世煒亦以好善聞弟公祺字
鶴年習計然術家業日起凡里中有善舉悉首倡之歲
饑爲粥以飢餓者歲儉販貴鬻賤以濟困乏歲疫施藥

舍棺以拯天行郡中同善育嬰普濟諸堂皆踵其法而行之年七十建壽安橋屆八十復建張勝橋卒年八十

一南匯志

李泓字韜文上海人秉性誠篤買吳閫有還金事又嘗焚逋券千金子陽字元春諸生舉鄉飲賓秉智字事貞有孝行嘗建宗祠置常稔田以贍宗族秉智子煥字琢明候補員外郎能承先志增置田葬族人三世喪乙亥歲祿借兄炯捐米賑飢又捐義冢施棺及育嬰諸事炯字心研附貢生孝友天性言動遵禮法生平儉於自奉而祭祀賓客必豐好行其德嘗若不及炯子丙曜字又

瞻屢試京兆不遇官大理寺右評事丁母憂歸恨不及
視含斂遇家祭及己生朝輒涕泣以父老不復出色養
數年後父卒哀毀得疾亦卒衰麻不去身距炯卒祇一
月也又煥孫應堦諸生著有靜深書屋文稿

上海志

李朝宰字梅客上海人太學生母高喪明舐以舌復明
值歲饑豫儲粟以贍飢餒俗有火葬者捐田勸瘞之子
枝桂字健林附貢生質直有文名內行肫摯以醫客京
師輦下諸公爭重之乾隆六十年

欽賜國子監學正嘉慶元年與

千叟宴

賜如例著有澹竹軒集從弟朝采字星門貢生性嚴重不
苟乾隆三十二年捐修明倫堂朝采子鵬冲字欽齋華
亭附貢生和雅寬厚歲劑藥施貧者又朝宰從子鵬萬
字海癡貢生工書畫槎源字德載附貢生能詩文工繆
篆鵬翰字翼天亦能文爲安義丞署縣事有政聲上海志
陸士彬字楚雄金山人敦樸好善里中平術成梁之事
悉力任之乾隆某年以五世一堂受

恩賚子天敘亦年踰七十孫本淵有還券事次洸亦好善
嘗獨力修建文昌閣麟貢生曾孫瓚邑庠生學使者彭
元瑞以泲濱耆善旌之

高一桂字進思青浦人諸生性恬澹尚意氣家不過中
人好推獎士類故人子不能就傅者招至家塾資給而
成就之治家嚴肅鄰里皆遵約束暮年與邵玘金瑜楊
敬授爲九老會談讌終日年七十八卒子鳳煒縣學生
有雋才早卒

顧世俊字時英華亭人父文煥諸生以孝行稱著有竹
廬詩草詠菊小品浙游詩草引玉瑣言等集世俊弱冠
入郡庠屢試優等乾隆癸酉赴省試路遇一婦攜子哭
甚哀詢知汴人夫某客死不得歸里卽傾囊與之父病
瘵侍湯藥者三載母沒哀感如父喪尋得疾卒

沈虞揚字元昆華亭人國子生先世自浙遷松虞揚性
好善歲饑煮粥平糶當事建書院修學校先後捐千金
司普濟堂增肉日再飯歲收佃入視他家數獨減善人
之稱溢於婦孺撫姪達成立達亦好善嘗欲捐田贍族
試安徽通判卒虞揚命子恕撫其孤年八十二卒達子
殤恕以弟之子嗣焉今嗣子置義田以承先志云

袁以仁字均溥華亭人候銓布政司理問母年至九十
而終以仁年已六十四哀毀特甚邑令麻城王勸以孝
廉方正薦力辭好施與遇公事捐輸恆倍有力者歲壬
子興修華婁學宮以某紳撓訟歷五載績用勿成賴以

仁事始集士林重之年八十卒

高騰字遇辰華亭人世有聞人家貧一布袍十年不易
顧慕義郡鄉賢祠久圯慨然倡修又修試院南之文昌
閣增舍三楹應試者憩焉爲人謀必忠有所請唯力是
視教其子皆成名年七十四卒

馬霽字雨村金山人諸生植品甚端喜施予館穀所入
節縮以贖親黨里中有節婦周以月米子藹聯貴猶訓
以義方不少假尤爲人所難年七十餘卒

宋維熊字渭田金山人諸生敦友誼重然諾嘗試江寧
同寓者暴卒遂不終試歸其喪象山賴鵬飛工詩家貧

落拓漂轉衛城主維熊家相倡和後卒於海鹽通元寺
不遠數百里歸其喪邑人皆知之

周煥字倬雲南匯人候補布政司理問署河南信陽州
州判乾隆六十年歲饑煥於勸賑外捐貲獨賑一鄉凡
鄰里就食計日給錢者兩閱月南匯田畝號段四至溷
淆不清民易爭訟煥呈請履勘丈量編次分晰嘉慶十
年析邑地隸川沙煥復呈縣具詳按畝給單名田者子
孫執守闔邑賴之他如掩骼濬河諸事尤見義必爲竝
有才幹云

陳明義奉賢人性淳樸能爲善一鄉嘗建橋梁施棺椁

給寒衣遇歉歲卽捐貲助賑他行事率多好義同時陳
文疇字崑良亦奉賢人服賈四方家小阜顧積而能散
里中有善舉率先爲倡邑 文廟初建首捐田百畝南
橋議創書院亦首捐田百畝然文疇名田無多畝也訓
子孫惟以孝弟力田爲事年七十餘無疾而卒

沈增川字元正上海人父雲秀喜交游樂施與增川事
繼母朱以孝聞雍正十年水災救生匱朽且收瘞之乾
隆十一年捐田租千餘石子朝鼎官貴州遵義府知府
能舉其職弟天洽太學生性淳慤子淞河捐州同知以
孝行爲鄉人稱願乾隆二十年歲饑振廩賑粥子璧琮

著有海日樓詩鈔璧璣光祿寺典簿著有文詠樓詩鈔
曾孫光溶諸生亦能詩著有曉珂初稿

楊永昌字克俊南匯人乾隆二十年大饑計口給糧累
月費二千餘金當事以名上

賜八品銜疾革命子取賑籍焚之曰桑梓誼應賑卹毋留
示子孫爲口實也子修德修年俱克承父志捐田義學

書院同善堂及建橋施藥諸事

南匯志

王發藻字忍庵華亭人幼孤家貧藉館穀以事母嘗主
周浦趙某家其廐馬忽絕繮至書塾前立而嘶發藻心
動遂借乘歸值母嬰危疾乃割股入劑進獲差後其祖

患頸疽復割股以療亦愈乾隆二十年學使李給至性
過人額以旌之

黃鑑字驥威華亭人生三歲父試澄江遂不知所往鑑
依母以居稍長遇人輒叩父蹤迹夜則涕泣禱天冀得
音耗乾隆甲戌夏逢一老衲曰爾欲見父吾同參朴庵
者是盍求之昭陽鑿水閒乎言訖不見遂渡江至儀徵
賢坊寺果得焉蓋已披薙久矣鑑懇請父歸不可請置
精舍近地奉養許之張進士梁諸生張夢鼈有黃孝子
詩

周汝梅字變廷華亭人九歲畢五經十三入邑庠力學

能詩母病侍奉湯藥衣不解帶者月母沒以哀痛卒
年二十其少作有碧山詩集聘妻胡氏守貞不字於明
年同月同日殉汝梅死又有張和字驥鐘亦華亭人父
母年皆七十餘母疾篤和日夜禱天夢神投藥尋愈越
二年病復發醫禱罔效視含斂畢嘔血數升謂兄曰賴
兄侍奉老父吾將從母地下矣遂絕勺飲父強之粥縣
愾數月會寒食胡氏號泣涌血不止遂囑婦勤奉堂上
并囑二子孝事父以贖己愆言訖而沒年三十三
宋旦字旭初奉賢人珩從孫幼孤遺產十餘畝僅供饋
粥念兩世未葬將盡賣以襄事有尼之者曰君家曾祖

兄弟尚有數人奈何獨力肩之且謝曰必俟兄弟同心則先人入土無期矣卒賣之以營窀穸且六歲時有族人欲奪其產因而擠之於河自辰及酉足下若有物憑焉得不死人咸詫爲異云

奉賢志

戴克疑字吟山婁縣人駿龐孫附監生母俞守節撫之成立家貧四出藉筆耕供甘旨年五十餘家居訓子每夜攜炊具伺母寢覺時進飲食製有寢衣便睡起夏月曬諸庭補百衲親友乃知之垂十年母壽八十餘卒勉營殯葬未幾亦卒

姚立字心儒金山人諸生母楊病劇立年十四痛哭籲

天而愈及母卒擗踊幾絕父婉諭之乃止父跌傷足延醫治之傾其貲始愈既又疽發於項後復患痢皆危甚立廢眠食割臂營救獲痊以勞咯血懼貽父憂每自諱父出必與偕舟泊泖濱父登岸失足墮水時已昏黑風馳浪卷立情急投水救父恍忽中忽兩手抱父立蘆荻中卒無恙立屢脫父於難然卒以感寒疾卒有司上其事

旌如例

薛章字煥如上海人事繼母以孝聞弟采弱而跛父母相繼沒章盡以遺產與之自率妻子躬耕力食性耿介

非分不取嘗糴米八斗課與一石卽還之卒年八十六

子良翰良臣能承其志

上海志

張興南匯人兄弟五人興獨貧日以擔水錢市魚肉奉
母母亦樂居興家黃元者亦南匯人以十指爲活養母
盡孝母沒迎其姊至家曰姊吾母所愛養姊猶養母也

時號城西二癡云

南匯志

殷士龍上海人父某爲族人毆斃積忿數年後舉兩子
曰今可復讎矣藏利刃要而殺之自首遞減三等戍陝
西鄠縣與同戍唐三善唐沒託妻子焉有校官子豔唐
妻賂士龍欲買爲妾峻拒之強之再士龍怒訴大吏斥

學官後又歸其孀與骨乾隆十一年赦歸又十餘年卒

上海志

孫韞上海人貧不能娶爲傭工養母母病痿傭鄰近以濟醫藥主家或與肉弗敢嘗必懷以貽母晝必三四歸夜不解帶者八年母沒慟絕復蘇年至九十餘

南雁志

錢塘字容聲婁縣人諸生母疾刲臂肉以進不愈哀毀與母相繼卒同邑胡鼎蓉趙萬里皆爲立傳徐大容爲

作哀辭塘工詩著有陟屺小稿

松江詩鈔

宋來生青浦農家子乾隆丙子歲饑設賑杜村來生甫四齡隨其母就食與母相失爲某嫗收養年餘嫗亡爲

泗涇沈氏廝養比長求母不得一日經姬墓默禱夢荷
葉一池有婦人以芋魁餉或告之曰此汝母也覺以語
人或曰此地蓮子涇居民以種荷爲業盍往尋之因徧
詢得其母方疑信閒其姊歸遽曰弟兒時右足有瓦礫
傷可徵也既而示之信遂奉母歸

陳文述青浦人少孤母岑迫於貧戚黨勸之改適文述
泣請留願爲小負販養母時年十一也母卒完節文述
能寒堪暑勤苦四十年家小裕不娶而爲三弟婚邑令
孫鳳鳴旌其閭

馬良法青浦農家子爲人傭得肥甘必攜歸奉父母後

葬其親無力覓工作冬月自櫂小舟袒臂入水撈石結草兩足踏灰沙使堅比成足上肉盡脫遂不良於行廬墓十餘年卒

丁履豫字叔安婁縣人世業醫兩兄一弟皆以所得資委之奉母又以其不娶為置妾既有子不復入室竟日夜奉母以居嘉慶二年十二月母卒將斂畫師貌母像諦視良久忽哭失聲仆地死年三十里人請之邑令某給額旌之

戴見元字陵雲婁縣人事母至孝曾割臂肉以療母疾不婚不試能詩工書畫有書窗遺稿一卷考各邑尙有

華士禧南匯人徐國城字心聲上海人諸生著有尊訓
樓稿王陳棟字匠龍青浦人諸生查澤祺字介壽婁縣
人盛堅修金山人操履方正爲善一鄉戴恩字勉石奉
賢人鮑純祖金山人張永鉉南匯人高崧字維嶽川沙
人入武學後棄去年六十補諸生徐爾鏞字鳴球金山
衛人徐彰城南匯人諸生性孝友著有杉泉文稿范來
鎬婁縣人諸生子學坤莊國華金山人子揆度孫麟陸
貽叔青浦人侯邦烈華亭人陳斯位華亭人高大觀川
沙人以上或以孝義聞或以割股著雖家庭庸行事迹
從同而有足以訓俗者因仿新唐書孝友傳例類次其

姓氏云

楊士璣字玉階婁縣人乾隆十八年舉人十九年進士
官吳川縣知縣擢蘭州府知府乾隆四十六年逆回作
亂激往查捕馬賊死事載

欽定蘭州紀略

雷曉字蕙樓華亭人事嗣母邵以孝聞少從翁春吳鈞
游善屬文工草書有幹濟才以貢入貲爲訓導卒著有
湘秋閣詩鈔

張爰原名樹芝婁縣人兄桂堂客漢中病篤爰疾馳數
千里視之兄卒扶柩歸後游中州客滑縣令強克捷署

嘉慶十八年九月逆匪作亂強殉難爰與青浦諸自涵
同時被害遂

恩優卹附祀韓城滑縣強忠烈專祠

松江府志卷六十終